



OPĆINA TEŠANJ

T: +387 32 650 547, +387 32 650 220;
F: +387 32 650 547
www.opcina-tesanj.ba,
e-mail: optesanj@bih.net.ba

MORA

Šta to radiš, sine?
Sanjam, majko.
Sanjam, majko, kako
pjevam, a ti me pitaš,
u mome snu:
šta to činiš, sinko?
O čemu, u snu, pjevaš, sine?
Pjevam, majko, kako sam
imao kuću.
A sad nemam kuće.
O tome pjevam, majko.
Kako sam, majko, imao glas,
i jezik svoj imao.
A sad ni glasa, ni jezika
nemam.
Glasom, koga nemam,
u jeziku, koga nemam,
o kući, koju nemam,
ja pjevam pjesmu, majko.

Abdulah Sidran 1986.

Uključi se!

Neka se i
tvoj glas čuje!

Iskoristi priliku!



Februar 2013.

eBilten

Općina Tešanj
Općinski načelnik

**Uključite se u raspravu o
Strategiji razvoja 2018.!**

Strategija razvoja općine Tešanj 2018.

Nastavak organizovanog i smišljenog promišljanja budućnosti.



Posljednjih godina razvoj općine Tešanj vođen je i usmjeravan kroz strateško planiranje, tj. kroz Strategije koje je usvajala Općinsko vijeće. A doći do Strategije u stvari znači odgovoriti na četiri pitanja:

- Gdje smo sada?
- Gdje želimo da budemo?
- Kako tamo da stignemo?
- Kako znamo da li smo tamo stigli?

I kada odgovorite na ova pitanja, i kada donesete strategiju, onda ste na početku puta koji traži upornost, posvećenost, finansijska sredstva, uključenost svih.

Još uvijek na snazi imamo četiri strategije kojima je definisan naš budući razvoj:


- Strategija za dostizanje vizije
- Strategija razvoja općine Tešanj 2007-2015
- Strategija podrške mladima
- Strategija razvoja socijalne zaštite.

Općinsko vijeće Tešanj je u 2012 godini usvojilo odluku kojom je pokrenulo proces izrade nove strategije razvoja, koja bi u sebi objedinila četiri postojeća dokumenta, te dopunila nova područja, nove ciljeve i planove. Takav dokument je

nakon nekoliko mjeseci rada, uz učešće 78 osoba (u pet različitih timova) različitog profesionalnog usmjerenja i životnog iskustva, izrađen i ponuđen Vijeću i javnosti na dalje dograđivanje i prihvatanje.




Nova Strategija razvoja općine Tešanj 2018 sadrži nekoliko važnih cjelina: Situacionu analizu, PEST i SWOT analizu, Strateško fokusiranje, Strateške pravce i ciljeve, Programe i projekte i dio operacionalizacije kroz definisane nosioce, partnere, rokove i procjenu sredstava. Izdvojena su četiri ključna područja: Ekonomija, Društveni sektor, Ekologija, Mladi. Ukupno je definisano 65 programa i projekata ukupne vrijednosti od oko 84 miliona KM. Iznos je prilično visok budući da su uključeni i programi i projekti koji neće biti finansirani direktno iz budžeta općine.



Prvi dio posla je završen, Općinsko vijeće je usvojilo nacrt Odluke, sada slijedi javna rasprava u kojoj će svi građani općine Tešanj, sva udruženja, sve mjesne zajednice, sve institucije i pojedinci imati priliku da daju svoje prijedloge i sugestije.

Nakon usvajanja konačnog dokumenta predstoji nam realizacija u kojoj shodno mogućnosti i odgovornosti svako treba dati svoj doprinos. Naravno, najviše odgovornosti i obaveze ostaje na Općinskom vijeću i Općinskom načelniku.



Uključiti sve svi mogu i putem Foruma na zvaničnoj web stranici općine Tešanj, koji je aktivan još od juna mjeseca 2012. godine.

Naša dijaspora *ili* Zajedno možemo više

Znanje i kapital s jedne strane, znanje, nezaposleni i okruženje sa povoljnim poslovnim prilikama s druge strane.



Ljudi se nekad teže razumijevaju. Teško je uvijek stati u drugu kožu, razumjeti probleme, teškoće i izazove drugih ljudi.

Takav slučaj je nekad sa razumijavanjem naših sugrađana koji žive i rade u inostranstvu i nas koji smo ovdje stalno.

Ponekad se teško razumijemo i malo saradujemo.

Zapravo je istina da nas je težak život i nevolja dovela u različite životne okolnosti (njih u tuđinu, a nas u državu sa teškom političkom i ekonomskom situacijom) i da smo se ponekad zaista otuđili jedni od drugih.

A trebamo jedni drugima!

Gdje bi nam bio kraj da se bolje organizujemo, da češće razgovaramo srcem, da iznosimo konkretne ideje i prijedloge. Ubijeđen sam da bismo mogli naći interes i korist za sve i da bi nam svima bilo bolje.

Znanje i kapital s jedne strane, znanje, nezaposleni i okruženje sa povoljnim poslovnim prilikama s druge strane.

Sada kada sam u prilici (i obavezi), želim potaknuti i osnažiti bolje odnose i više koristi za jedne i druge.

Za početak bismo se trebali prepoznati (identifikovati), a nakon toga se bolje informisati. Trebamo ljudima reći šta je to što se radi u našoj općini i što bi mogla biti dobra poslovna prilika

Svi koji to žele, mogu svoje podatke ostaviti u web bazi na općinskog web stranici. Podaci će se koristiti za kontakte, razmjenu informacija i sl.

[www.opcina-tesanj.ba /kontakt/](http://www.opcina-tesanj.ba/kontakt/)

za njih.

Vjerujem da ćemo naći mnogo ideja i prilika. Do nekih sam i sam došao:

- Bilo bi dobro da osiguramo trajne i korisne kanale komunikacije
- Djeca iz BiH bi mogla ići na usavršavanje stranih jezika u dijasporu, njihova djeca bi mogla boraviti više vremena u BiH da

OBAVIJEST

Namjera mi je da minimalno jednom mjesečno javnosti na ovakav način predstavljam neke aktuelne događaje i aktivnosti.

Ideje, sugestije i prijedloge svi zainteresovani mogu dostavljati na e mail:

suad.huskic@opcina-tesanj.ba

ponesu nacionalne kulture i identiteta

- Mladi ljudi koji se školuju i rade na različitim pozicijama bi mogli svoja iskustva prenositi i na druge (možemo biti ponosni da imamo jako uspješnih ljudi i u dijaspori i u BiH i vjerujem da svi imamo šta od njih čuti i naučiti)
- Poslovni kontakti, zastupništva, ... Ovo je početak spiska mogućnosti. Ovo je poziv na saradnju i rad.

Predlažem i nudim da općina i Općinski načelnik za početak budu spona, kasnije to mogu biti udruženja, ustanove, preduzeća.

Pozivam sve one koji žive i rade izvan BiH da se jave da organizujemo jednu elektronsku bazu podataka o njima i da znamo kako ih možemo kontaktirati, slati im različite informacije, čuti od njih ideje i prijedloge. Kada vidimo gdje smo i „kako smo raspoređeni“ lakše ćemo naći neke oblike zajedničke saradnje.

BLIC VIJESTI

Općinu Tešanj posjetio je Austrijski ambasador N.J.E. dr. Donatus Köck u društvu sa trgovinskim savjetnikom Sigmund Nemetijem.

U rad je puštena prva solar na elektrana na prostoru općine Tešanj. Vlasnik elektrane je preduzeće Subašić.

Okončano je imenovanje predsjednika savjeta mjesnih zajednica u 24 mjesne zajednice. Time su obezbijeđene pretpostavke za puno funkcionisanje lokalne samouprave.

Javna rasprava o Nacrtu regulacionog plana Jelah produžena je do kraja mjeseca februara.

Općinu su posjetili predstavnici EUSESBI projekta koji se finansira iz sredstava EU i kroz koji će biti jačana poslovna infrastruktura u nekoliko općina u BiH među kojima bi trebala biti i općina Tešanj.

U petak 1. februara otvoren je novo uređeni pogon sirane u vlasništvu zadruge Zlatna kap. Svečanosti je prisustvovao i direktor USAID-a u BiH, David J. Barth. Zadruga planira otkupljivati i prerađivati oko 400.000 litara mlijeka godišnje. Zadruga je široj javnosti poznata po svom proizvodi Tešanjski sir.

Preduzeće SGI potpisalo je sa općinom Tešanj ugovor o izgradnji postrojenja za reciklažu automobilskih guma i PET ambalaže. Očekivana investicija iznosi 7 miliona KM, a planirano je da cijela investicija bude okončana u dvije godine. U prvoj godini bi trebalo biti zaposleno 15 radnika.

NAJAVE

Od 11. do 14. aprila planirano je održavanje sajma BIZNIS 2013. Tešanj. Sajam će ponovo biti organiziran u prostoru firme MADI (nekadašnja SLOGA). Organizator sajma je Udruženje privrednika.

Mjesne zajednice općine Tešanj trenutno rade na uspostavi svojih prioriteta za naredni period. Isti će biti korišteni kod izrade Liste kapitalnih projekata za 2013. godinu, koja će Općinskom vijeću biti predložena na martovskoj sjednici.

Strategija razvoja 2018. upućena je u javnu raspravu i građani će moći da iskažu svoje prijedloge, sugestije tokom narednih 45 dana. O samom rasporedu javne rasprave moguće je više saznati putem općinske web stranice.

I u 2013. godini će biti implementiran projekat Omladinske banke, što znači da će mladi kroz neformalne grupe moći da prijavljuju projekte koji su za njih interesantni. Odabir i nadzor nad provođenjem projekata vrše mladi uz podršku Općine Tešanj i Fondacije Mozaik.

Do 22. februara bit će potpisani ugovori o finansiranju projekata udruženja građana Ove godine prijavljeno je ukupno 60 projekata u sportu, kulturi i drugim oblastima.

Za 14. februar Općini Tešanj je najavljena posjeta građanske koalicije "1. mart", Koalicija organizacija civilnog društva, udruženja žrtava, udruženja boraca, organizacija povratnika, izbjeglih i raseljenih, koji djeluju na utvrđivanju istine i borbi protiv genocida.

Povodom povremenih medijskih istupa pojedinaca u vezi sa periodom odbrane 1992-1995. godine, Općinsko vijeće Tešanj je na svojoj 4. sjednici jednoglasno usvojilo:

R E Z O L U C I J U **o odbrani u periodu 1992-1995. godine**

Općina Tešanj je u prvoj polovini 1992. godine prihvatila oko 25.000 osoba prognanih iz Dervente, Doboja, Teslića i sjeveroistočne Bosne. Protjerani su od strane sljedbenika Radovana Karadžića samo zbog toga što nisu bili Srbi. Svi preživjeli iz tog perioda ovo dobro znaju.

Potom je, zajedno sa općinom Maglaj i teritorijom sadašnjih općina Doboj-Jug i Usora, uspostavljena odbrana od progona sa područja općine Tešanj. Cijeli ovaj prostor tokom perioda 1992-1995. godine bio je izložen kontinuiranim agresivnim napadima koji su imali za cilj okupaciju teritorije, rušenje ustavnog poretka zemlje, ubistva i progon stanovništva. Napadi su neprestano bili praćeni granatiranjem, raketiranjem i avionskim bombardovanjem civilnog stanovništva. Uz to, nepunu godinu bili smo u potpunoj neprijateljskoj oružanoj opsadi - kada su i agresivni ataci na linije odbrane i na civilno stanovništvo bili do maksimuma pojačani.

U takvim okolnostima, koje su sa fizičkog i psihičkog stanovišta bile na granici ljudske izdrživosti, civilno rukovodstvo, vojne komande i sigurnosne službe štatile su cjelokupno stanovništvo i sankcionirale svaku pojavu pojedinačnih osveta. To potvrđuje i činjenica da su u organima i institucijama lokalne uprave, u redovima Armije RBiH i u Centru službi bezbjednosti od početka do kraja agresije, pored Bošnjaka, bili i pripadnici drugih naroda, Srbi i Hrvati. Jedinice Armije RBiH i 110. brigade HVO zajedno su branile ovaj prostor.

Općina Tešanj podržava rad državnih institucija na otkrivanju i privođenju ratnih zločinaca. Pozivamo nadležne institucije da poduzmu aktivnosti kako bi konačno bili identifikovani i adekvatno procesuirani oni koji su odgovorni za avio-granatiranje civila na Tešanjci u kojem je poginulo sedmero djece i dvije stare osobe, zatim civila koji su usmrćeni dok su obavljali žetvu, civila koji su stradali od 44 rakete zemlja-zemlja, civila koji su stradali od kasetnih bombi... Spisak ratnih zločina počinjenih nad civilima sa naše teritorije veoma je dug.

Mi smo ponosni na našu odbranu u svakom njenom aspektu, i duboko smo zabrinuti zato što neko radi na tome da se ta odbrana kompromitira i ocrni.

Općina Tešanj osuđuje svako djelovanje onih kojima je cilj da se žrtva izjednači sa zločincem, da se agresor izjednači sa onima koji su branili svoju domovinu, svoj život i čast.



Armija RBiH



Spomen obilježje Tešanj



Mostar, 2013